

給俾得安接○兵曹啓曰今此設科適當號牌修舉之日京外業武者聞風爭赴而遠地之人或因訛言以為科期因國喪退定故雖未及上來而全集京中者其數亦多取考兩所錄名則一二兩分送各三千四百外又有投疏追赴者數百餘人以此通計則幾至八千當初本曹額數稟定之時以文科六百館試對舉原定六百而其後移送一百于平安道則京中試取者只兩所各二百五十也舉子之多未有盛於此時額數之狹又如此亂後多取武科固為一巨弊而此則非殿試之例所以慰悅遠來之人獎進欲成之才雖不得廣增其額請平安道則試取於六百之外而京中兩所各增五十以准三百取之則無傷於事體少慰其舉子之望矣 荅曰依啓且代射之弊各別痛禁○謝恩使朴鼎賢鄭雲湖等上年十一月十六日在北京馳啓竣事形止且言十月初一日容妃任氏誕生皇子頒詔天下而本國詔使翰林院編修姜曰廣工部給事中王愛尹已為差出開春後當為發去云○夜東方異方有氣如火光熒惑犯天街星○丁酉 上下教曰上年太監之行國內掃如千萬意慮之外詔使先聲又到言念民事予心如割前頭越海之期必在三月望後未知何以處之則民之受害少而耳無生事之患耶大臣吏戶禮三曹堂上斯速命招從長議處○下